

今

世

說

今世說卷六

仁和 王 耸 丹麓 撰

豪爽

世祖章皇帝嘗獵過滹沱河宋牧仲從行時天大寒
河水濶二丈餘宋揚鞭大呼一躍而渡 上壯之

宋名莘河南商邱人年未二十博學能文章詩歌
筆翰動天下望而卽之溫其如玉出判黃州虛已

向學與四方賢士大夫相交

結日肆游江湖山谷之間

王阮亭爲同考至白門夜鼓柁行大江中漏下將盡
始抵燕子磯王興發欲登會天雨新霽林木蕭颯江

濤噴涌與山谷相應答從者顧視色動王徑呼東芭
以往題數詩於石壁從容屣步而還翼日詩傳白下
和者凡數十家

施愚山倡學湖西問道者車接轂蕭孟昉爲之供屏
屢節廚傳勝流欽集賓至如歸

吳六益訪汪鈍翁邸舍每被酒自誦其所作游五嶽
詩音響琅琅若出金石覺爾時意致遒上不可復及
汪然明教其子成名卽放浪湖山青簾白舫選伎徵
歌日與二三知己傾尊賦詩以爲笑樂望見者謂前

則子瞻後惟廉夫差堪彷彿其概

汪名汝謙江南歙縣人居武林虞山錢宗伯嘗稱其量博而智淵幾沈而才老熟腸俠骨囊橐一世之志氣如洑流瀆泉觸地涌出子玉立舉明經繼昌己丑進士官觀察

周櫟園性嗜飲喜客客日滿坐坐必設酒談諧辨難上下今古旁及山川草木方名小物娓娓不倦觴政每陣疊出新意務極客歡而去

熊雪堂令汝陰時廬州被圍鄰郡偵探至城下熊從埠塊間磨盾鼻作荅一手雙挾硃墨二筆運腕如飛一往勃勃真覺骨嶷氣涌

熊名文舉字公遠江西人辛未進士歷官侍郎

吳慶百應薦入京止竹林寺毛季蓮嘗偕叔大可過
吳寓輒據柳牀自吟所爲宴集及登臨諸作大聲撼
四壁吳顧大可君家阿咸正復不減將不使卿單行
義興大饑當事集紳士議賑紳士曰賑饑是極難事
毋輕議也徐竹逸曰天下難事我輩不爲誰爲之者
條陳數則活數萬人

李如穀官武昌郡守荊州曹叔方以所編樂府投之
會李坐黃堂上立取梁州序親自度曲以扇代拍時

隸役百十輩皆屏息而聽寂若無人歌罷卽出于金

贈曹

曹名國渠湖

廣江陵人

申鳬盟偕楊猶龍殷伯巖行橐薄中林葉颯然疑有虎楊據片石負杖叱咤萬壑雷鳴同行爲之神王

楊名思聖直隸鉅鹿人丙戌進士歷官侍讀天才雋妙風神卓絕工詩善書法性慎許可間稱量人物時有貴顯以壇壝自命者輒不肖屈一指聞者志之

殷名岳直隸雞澤人官睢寧令

侯朝宗豪邁多大略少本有濟世志嘗與吳次尾夏

彙仲醉登金山指評當世人物臨江悲歌二子以侯比周瑜王猛

侯名方城河南商邱人幼博學隨父司徒官京師習知中朝事嘗歎曰天下且亂所見卿大夫殊無足以佐中興者其殆不數乎去游金陵爲一時所引重論者謂其詩追少陵古文出入韓歐

吳園次蕭散自得陶然於酒所至偕故交文士名娼高衲放浪于山巔水涯每醉輒歌吟笑樂詠調終夜酒痕淋漓頭伏几案與之游者至忘寢食

宋俗上元夜張燈飲酒睢陽司氏巨族也張銀瓢容酒數斗約能勝飲者持瓢去羣少皆醉臥窘甚時漏

下三鼓會賈靜子服龙衣駕鹿車自百里外至忽叱咤登階舉滿一飲卽擲瓢付奴持之不通姓名坐賓駭散

雲間田彝淵董蒼水兩孝廉素稱好客四方士大夫接踵而至一日集圍如草堂赴者五十餘人兩孝廉相繼迎入未與談卽呼常從具衍篋出紙筆分題鬪韻而賦之有頃賦已會食命廚割腥酒炙交至酒中各唱所業盡歡而罷

計甫草自海陵歸渡江會大風雨雪舟不得發同行

者皆垂首歎惋計坐舵樓下手王阮亭詩讀之至論
鄭少谷絕句哭失聲既乃大喜拭涕起坐雪中觀江
濤澎湃吟嘯自樂

李彌園性好游每興發雖愛子牽衣割裾不暇顧他
事益漫不訾省踪跡幾遍天下所至名勝輒爲文以
記之

李名塗字季子江南興化人博學好古少負才名
丰標落落然與之言縱橫古今懸河注瀉秀傑之
氣見于鬚眉性僻山水每遊必窮巔崖隈澳凡豺
虎所嗥蛇豕所窟漁樵不能至者必身歷之而後
快

淮海杜湘草過武林冒雪遊西湖樂甚次日適王丹
麓使至遂以相聞據案作書忽傳方伯監司聯車到
門並謝不見士論高之

杜名首昌江南山陽人
書法文詞卓絕一時

吳錦雯游寓蘭陵酒徒劖客及弄阮咸撥箜篌者滿
座上日解綻袍貰酒酒酣對客揮毫烟雲滿紙

錦雯生具異表身長七尺餘目青睛鬚髯甚紫怒
則鐵張胸有毫數莖長三寸爲人少言不泄及遇
事不平輒侃侃不畏彊禦至推座罵起與人交舒
鬲要負氣好俠急友患難蓋彊直敢任其天性也
孫介夫遇王惟夏于邗關執手道故王固善飲與入

酒舍洗醕而酌浮滿數十盞初座客闌甚聞兩人聲
奪耳皆瞪眸迎視氣爲不吐

王名吳江南太倉人善詩歌古文詞
樂府吳梅村歎其才爲天下無雙

陳興霸喜談兵論効抵掌天下事酒後耳熟輒罵古
僞豪傑不中一文錢

陳名孝威江西臨川人大士仲子

毛稚黃言丈夫既有此六尺身何可不令千古

丁野鶴官椒邱廣文忽念京師舊游策長耳驢冒風
雪日馳三四百里至華嚴寺陸舫中召諸貴游山人

琴師劖客雜坐酣飲笑謔怒罵筆墨淋漓興盡策驢

而返

丁名耀亢山東諸城人襟期曠朗
讀書好奇節高譚驚坐目無古人

吳舒鳬托懷豪逸情與興俱

吳名儀一浙江錢塘人髫年入太學名滿都下二十爲人師經史子集一覽成誦古文法歐陽永叔王荊公詩宗杜子美性喜飲飲醉值市井子輒謾罵之姜定菴京兆重其才延之幕中歷邊塞詩文益

謝晝也好施數致數千金都緣手盡復假貸以費京師謂之窮孟嘗

謝名晨浙江山陰人嘗登大觀臺觀錢塘江潮忽思年五十無成大慟見者皆怪笑之

楊序王閑居器具精良非世所恒有客至命酒珍錯
疊陳少醉卽欲賦詩或召冶童歌自吹簫以和之

楊名方榮一字東起江南武進人父以進士起家累官中丞家多伎樂奉善歌舞治園圃亭池之屬爲里中冠楊生旣習知歌舞處凡吹簫擊鼓鳴箏度曲俱幼眇自喜又美姿容時比之潘衛以望見爲幸每一出遊至傾市觀顧好爲文章能學歌詩獵傳記雖善談笑不爲嫚戲後赴省試罷歸愈發積力學凡昔日所往還者率謝絕不爲通日使吾讀書三載卽不如古人何至若妄庸人徒逐若輩以爲豪耶未幾以病卒年止二十有七諸從游者無不流涕

王水雲常與茅子鴻偕渡大江風濤汹湧王掀髯稱

快曰吾胸中鬱勃之氣對此稍舒茅亦爲之放膽

王名舟璫字自虹浙江餘杭人抗爽負氣不習軟媚貧時得錢不甚惜多與賢豪結驩壬午舉孝廉既久不得志始摧抑爲令除授與安又爲信之瘠邑城中才數百家爲之期月坐嘯無所事乞免官不許嘗抱鄒暝日目作吏顧如此乎發爲詩多幽憂峭激類陀傑失志之人楚黃曹石霞嘗言每讀水雲集風雨欲

來聲淚交下

茅名兆儒一字雪鴻浙江錢塘人孤介

自持情深

一往詩詞書畫涉筆輒工

張晴峯性曠達嘗爲水部郎貧不能給一日貸錢舉火過慈仁寺竟倒囊購書以歸陶然自適

張名衡直隸景州人辛丑進士官浙江學使嘗曰節費以奉親省事以却謗忍氣以養和讀聖賢書

近直諒友以無忝所生聞者嘉歎其言喜彈琴後
得雷氏古琴修而銘之紀以長歌一時名士屬和
者數百人

容止

梁蒼巖襟期瀟灑意度廓落大類坡仙

彭禹峯長身修髯聲若洪鐘一飲能舉數升一食能
盡一彘肩汪鈍翁目爲撥亂之異才

彭名而述字子箇河南鄧州人奇偉
卓犖氣蓋一世族長進士歷官叅政

張紱菴姿容瓊偉飲噉日可三升興至蒲博爭道獨
酌引滿呼小僮撾鼓奏伎奮襄激昂大噱不止

張名王治字無近江南太倉人涉獵強記雅擅絕才中丁亥進士官黃門初教菴兄西銘以經術負盛名其負笈從遊菴舍爲滿揮洗輶餐倒屣莫及枚菴領身容接人人各盡其意時論西銘之有教菴猶士衡之有雲
孟陽之有協也

黃大宗狀貌奇偉王昊廬見之歎曰風神超逸卓有父風

王名澤宏字涓來湖廣黃岡人少負異姿纔十餘歲下筆娓娓千言乙未成進士官少詹李文孫稱其溫然如君子

周芮公冲懷貞淡與之晤對如揖廣成如瞻水鏡

周名廷鑑字元立福建晉江人戊辰進士僻耽吟咏尤好與騷人衲客相酬唱

丁文博翁目明秀如碧梧翠竹

丁名彥浙江嘉善人
己丑進士官水部

吳六益目錢礎日神姿崖異有壁立萬仞之概
閔伯宗性簡默意致蕭遠殊不大快人意久與居處
覺欣然如飲醇醪

閔名派魯一稱曹夕河南祥符人官
溧水令善詩雅曠絕倫爲後來之秀

嵇叔子目王丹麓神致蕭散超然物外

程穆倩眉宇深古視下而念沉處治不媒進處亂不

易方

程名遠江南歙縣人能詩善書畫
尤工篆刻蕭森老蒼超然有異

李戒菴美風儀嘗于上元夜著絳衣與郡中名士集
賀監祠乘月上湖橋長嘯十洲人遙望俱謂神仙

李名文純字姬伯浙江鄞縣人父榜官西川提舉
知合州戒菴少善讀書老而不衰詩古文詞各臻
其妙與人言古今成敗爛若披掌聽者忘倦至所
讀書無不經手鈔平居靜守一几流汗黏席寒風
裂窗筆墨

未嘗少間

丁大聲軀材拔起意識豪畧咳如挺鐘言同奔河

丁名克振浙江蕭山人用經術溉文著于
鄉邑其因人緩急又多節概有魯連之風

柏巖山過涉園魏青城稱其高風秀骨英采惠姿照

映泉石

柏名立本江南華亭人年未及冠畫理精妙已入宋元之室

魏名學渠字子存浙江嘉善人戊子孝廉官少參

韋六象神朗貌癯衣布不肉食長夜擁絮被危坐不寐讀書至旦爲常高簡淡泊彷彿如枯巖禪客與人言肺腑傾盡不事表襮塵俗人望之頽然自遠

韋名人鳳浙江武康人與兄劍威並能文章尚氣節

吳錦雯張祖望並有修髯夏日嘗促膝吟咏意思蕭曠毛稚黃戲以詩云吳公美髯不易得張也于思亦

自奇長日吟詩相對坐。南風吹動萬莖絲。相與大笑沈去矜形弱。不勝衣而骨性剛。挺平時與人語氣纔屬及發辯議。則電閃霆激摧屈一坐。

徐武令爲人樸訥辭艱于口平居輒好書寫不知摹局每自比方葛洪

介公風儀蕭散寡言笑體羸若不勝而神鑒淵然每與一時諸名士接但以目會四坐盡通退相品題不失分寸

介公名元燈字明
介天童寺西堂

企羨

徐立齋扈蹕南海 世祖親授玉虬 一日顧問尤悔
菴者三每覽西堂雜組稱爲才子時有以讀離騷樂
府獻者 上益讀而善之令梨園子弟播之管絃爲
宮中雅樂比之清平調云

徐名元文字公肅江南崑山人己亥狀元及第官總憲

徐健菴負雋才好交樂善於士類尤極推獎宇內之
人羣歸之如百川之赴巨海

徐名乾學字原一庚戌探花及第官贊善與弟果
亭立齋並以文章顯名當世時號三徐學博才雄
與之游恂恂謙謹言論所及爲武林所宗

新城王西樵阮亭每過郵亭野店輒題詩壁上詩旣驚人使筆斗大龍拿虎攫尤悔菴道經燕齊見之解鞍造食坐對移晷不能去

彭羨門驚才絕豔詞家推爲獨步王阮亭稱其吹氣如蘭每當十郎輒自愧傖父

彭名孫適字駿孫浙江海鹽人己亥
進士御試博學宏詞第一官翰林

王阮亭宦廣陵一夕雪甚漏且三十下風籟寂寥街鼓寂然燈下簡篋中故書得吳賓賢詩且讀且歎遂泚筆爲序明日走急足馳二百里寄之吳感其意爲

刺舟來郡城相見歡甚

汪鈍翁初未游西山逢人輒相諮詢或曰西山雖復崇深意謂不如東南諸郡清潭鏡澄層峯屏峙一花一石相對饒有勝情

廣平申和孟不欲輕通貴交惟致書汪鈍翁微訊王吏部近狀汪報之曰吏部蕭疎簡遠不失故武誠吾黨第一流也

申鳬盟道未晤櫟園未睹滄海自是生平兩闕

周櫟園以少司農出爲督糧使使江淮間四方之士

慕之者爭願見司農舟車輻輳道路爲隘

周櫟園貽胡元潤詩卷輔以朋尊胡展帙長哦啓冕
浮白不知秋風吹墮白日

胡名玉昆江
南江寧人

李方山客南昌有傳宋荔裳已死者特爲詩弔之與
宋初未識也後至武林聞宋尚無恙李喜甚借友人
馬疾馳相視且出詩讀之兩人因與泣下霑襟已命
酒狂飲極歡策馬而去

李名日景山
東歷城人

王丹麓居窮巷門除肅然顧且巷過每促席移晷嘗語人曰見丹麓如把秋英清芬襲人如循古礪仰峭壁驟難梯接

計甫草過順德日晡方就旅宿忽念歸震川昔佐此郡有廳記二篇遂徒步入城求遺址不可得乃入署傍廢圃中西向設瓣香流涕再拜而去

盛此公嘗願此生得一少年如張緒衛玠王子晉能飲一斗不醉得一老縑老黃能痛飲酒記天寶遺事得一遲暮佳人能歌離騷舞三尺劎醉讀南華秋水

篇

盛名子斯一名鑑字
鉅侯江南南陵人

王山史與李天生初未相識一日邂逅長安茶肆隔
席遙接各以意擬名姓及詢之皆不謬遂與定交

王名宏撰字無異陝西華陰人學
粹天人性命克紹濂雒關閩之緒

陸麗京酷推陳際叔文典冊類相如陸撰沈獻廷祝
文稚黃不覺謂爲陳作陸有欣色

沈名士逸浙
江仁和人

陸麗京梯霞弟聚處嘗空瓦屋三間張效青步青

就居于陸諸駿男過張曰昔張陸同居帷下今復有
醴泉交讓之歎

梯霞名堦高文異采與兄麗京鯤庭競爽一時時號三陸

效青名俊浙江仁和人步青名壇效青弟也庚子孝廉

胡彥遠高自棲托神理雋邁嘗隱河渚近止城北芳樹池塘環接戶外諸駿男每過談彌日歸語人曰嘗謂永興南穴汲郡北山綰邈不謂近在咫尺

閩中邱則飛以賣穢爲業游於山水之間喜吟咏集成求雲間張洮侯作序過虔州關以詩謁權使者見

張序云詩能張洮侯作序豈尋常商賈耶輒免其稅

張名彥之一名慤爲王屋孫江南華亭人卓犖知大節深沉好書詩歌與董黃齊名尤喜自負使酒善侵人然實無他腸人以是原之

傷逝

曹顧菴侍從說詩數受世祖恩眷攀鬢餘痛常結
胸臆每聽猿嘯鶻啼便欲愴然霽涕

汪梅坡早年子女不育哭之甚哀每一念至輒疑身
是眼淚結成

汪名鶴孫字雯遠浙江錢塘人神情飛動識解過人錢虞山目爲閭鍾之才癸丑進士官翰林

林鐵崖持節駐珠厓其地故多颶風風起拔山飛樹
林嘗袒立中庭仰天祝曰好將某吹送到泉郡開元
寺內挂東西千丈二石塔上然後呼僧組引而下得
見吾父母拊棺一慟幸甚

王異公賦十二哀詩追數舊游目規口歎流灘揮灑
各竭思盡致能令讀者摧惻

王名撰江南太倉人古懷落落
生平不妄交接必終身以之

繆于野謂鍾廣漢若不歿則神懷散朗學義淹長在
後進中吾未見其匹也

繆名永謀浙

江嘉善人

陳緯雲云鄒董相繼零落蘭陵舊游酒旗歌板故地
闌風長雨不可復尋言之悽然不待過黃公酒鑪而
始慟哭

陳名維岳其年弟
也江南宜興人

陸麗京與沈駿明素無深好聞沈負才蚤世乘醉達
其家哭之失聲從子儇胡不輕與人定交者亦一哀
出涕

沈名炳浙
江錢塘人

趙山子旣歿有人議其短長吳聞瑋擲盃謾罵曰斯人不死鼠子敢爾

趙名澐江南吳江人癸卯孝廉

吳名鏘一字玉川吳江人好游喜爲詩每遇名流勝集言論娓娓可聽娶龐氏字惠纓亦工詞翰流傳甚朴嫁時龐其頗厚以吳不問生產傾囊佐之情安澹泊晨昏或不給倡和自如

諸駿男過廣陵歎曰小有之風流頓盡于一之宿草久衰柴丈遯跡于白門梅岑栖踪于遠郭故人雲馳雨散念此能不傷懷

小有名姓李名盤一名長科江南興化人

計甫草有才子準早天哭之哀爲作思子亭

準字念祖幼慧能文章獨好儒先之學甫草爲聘
宋旣庭女女名景昭年十二聞夫死守貞居小樓
十年不下微聞親戚有欲奪其志者輒不食凡二十日嘔血至盡死

王丹麓有三子幼子小能最鍾愛六歲蚤殤王大哀
慟或爲太過王曰佳者不存存者又不能佳吾目未
喪方自愧不及情君乃爲太過耶言罷復益歎歎

今世說卷六

終

今世說卷六 傷逝

十六

今世說卷七

仁和 王 暁 丹麓 撰

棲逸

孫鍾元居蘇門夏峰村清泉嘉樹映帶茅衡一觴一
咏翛然物外李工部以爲先生本非隱者其少時豪
俠之氣尚自稜稜爽露

李名震生號慎菴江
西安福人乙未進士

徐伯調處梅市扁舟箬笠弋釣自娛落落與世俗鮮
有所諧會宋荔裳分守紹興宣城施愚山寓書于宋

曰山陰有徐穉者渭之亞也宋遣人招之久不至比
宋罷官客湖上徐乃時時來相與盱衡抵掌抗言今
昔意所不合雖尊貴甚有氣勢口期期不服

宋射陵奉母不樂仕宦退隱射陽之濱自號耕海潛
夫名其圃曰蔬杯

宋名曹字邠臣江南鹽城人工爲詩尤精書法
海昌朱近修稱其古道照人足以師表海內

宗定九性不喜煩與人對終日卽病飲酌數夕亦然
或值勢利毀譽之場便如溽暑置身赤日下移家鄉
僻閑居未嘗至柴門外或客至或入郡始一到門不

則數月兀坐草堂而已

定九處東原草堂秋日燕去巢空巢泥時時落汚几席乃命童子探巢汲水洗之復徵洗燕泥詩酷嗜梅花堂有古梅一株時人謂之宗郎梅

王酉山解井陘之綬高臥海曲清流映帶喬木鬱盤
乃綸竿觴笠釀黍種樹間與田夫野畯較陰晴課解
稻以爲樂

王名章山東萊陽人
丁亥進士官邑令

魏善伯曉聞鳥語知是天晴起來獨立自謂至樂
魏和公登華山絕頂日月從兩耳升降視黃河如襪

帶委地下燕趙秦豫隱隱見黑子俯仰天地悲從中
來有入山披髮長往不返之意

和公素持高義重然諾好似儻畫策林確齋以爲有太史慈之風

龔柴丈隱居清涼山曲有園半畝種名花異卉水週
堂下鳥弄林端日長無事讀書寫山水之餘高枕而
已

郭去問隱居綿亭山中三十年織簾讀書不求仕進
時比晉劉鱗之

郭名鼎京福建福清人書法最工兼擅繪
事宋去損嘗云每展郭畫便思放杖投足

邱維正隱武原秦駐山舍茅籬種身率妻子力作以食恒業樵間釣弋小販暇說詩書教二子孝弟不見衣冠客田夫牧豎相爾汝懽甚素與朱近修善朱乘問訪之邱方負薪熟眎曰何憊也出飯一盂菜糲對食喋喋竟日不離樵事朱曰能出山信宿草堂中乎不答抱稚孫以嬉久之曰十年欲游洞庭山無一貫錢而止朱遂去

邱名上儀江南武進人少攻舉子業好奇計後去而應武試遂成進士累官叅將每之官肩襍被一囊去來不名俸外一錢蒞嘉湖瀕海賊蠭起憚其威浙以西咸帖服守土吏毒民邱峻節風之土民

守叅府門百人賀之不內樹豐碑署
天下第一清官過其下輒拜而去

沈去矜家臨平東鄉嘗謂張祖望曰居山食貧亦能
不改其樂恨無黔婁之婦穎士之奴

羅瑕公云樓居受用天氣看春夏過接處光景絕微

羅名孚尹江
南上元衛人

申自然居無定所野店僧寮匡牀布被之外更無長
物間走荒臺木末哭其所知謂人曰終當以哀死化
爲杜宇擾人魂夢耳

申名浦江南華亭人以畫名于時黃太
沖嘗言自然好哭似臯羽無家似思肖

賢媛

李孝貞事父終身不嫁閭巷聞而化之諸婦女有爭言詬諱相恐赫戒毋令孝貞知時復爲之語曰生女慎勿嗔養父不嫁有孝貞

孝貞字鳳秀州李夢康女也夢康士而貧夕不再
炊女織維以佐戶饗父疾禱于天有鳥銜果蓏墮
藥拌中嘗而進之脫然愈里中世族爭欲聘孝貞
孝貞益不自安一日請于父曰女孰賢佯曰善事
舅姑耳女曰休矣焉有舍我父
事他人親以爲賢乎竟不可奪

汪魏美亂後隱居不出其內媢欲強之試禮部出千
金視汪妻曰能勸夫子駕則畀汝對曰吾夫子不可

勸吾亦不愛此金其人慚而止

汪名漸浙江錢塘人年二十二舉孝廉甘貧不仕嘗獨身提藥裹往來山谷間宿食無定處與人落落性不好聲華時人號曰汪冷當事或割俸金爲壽不得却坎而埋之里貴人請墓銘百金拒弗許妻錢氏字瑟瑟建寧守飛卿女初成婚謂曰吾本寒儒得連媯貴室所望知禮義孝事姑嫜和妯娌足矣侈簪珥綺繡之飾毋庸也錢卽盡去服飾屏侍婢以疏布親操作

杜于皇母性方嚴生平不肯見畫師一日于皇遇善手曾鯨喜以白母且云鯨老矣寫照其宜也母作色曰安有婦人呈頭露面與男子注目熟視而不知羞者先王制禮男女有別何嘗云老者不在此例耶

宗定九少時奉母陳家居值歲凶啼飢號寒初不向人使從此不知有廉恥品行事大于時以爲名言

陳江都人州守九室第三女也歸太學宗景嚴少嫺家教讀五經周禮孝經女孝經諸書兼通通鑑二十一代史有訓子詩六章盛傳于世

吳岩子吐辭溫文出入經史與人相對如士大夫

吳青山人爲卞楚玉配以詩名工書法晚更好道得奇疾疾作則右手自運動日夜作字不休或濡筆書紙上悉成玄理疾止不復記憶凡二年而愈白髮朱顏奕然有力砂之色長女玄文工詩辭次女德基善畫並賢能好讀書精筆札先後事劉孝廉竣度竣度以賢豪名廣陵

丁季淵繼婦張夫人親喪三年不脫衰以親染風疾終身不言風嘗作討李賊檄顧和知以爲孔璋讓其英蕤賓王失其峻烈

顧名若璞浙江錢塘人上林署丞顧友白文學使
黃寓庸長子文學東生婦生具夙慧尤好讀史上
自班馬以迄列朝典故能陳說或論著其大旨又
以其餘力自肆于詩古文每夜分執卷諷詠良苦
曰使吾得壹意讀書卽不能補班十志或可詠雪
謝庭嘗于食頃作七夕詩三十七首一時歎其敏
妙文章節行爲
武林潤秀之冠

術解

胡勵齋博綜羣書尤精天官家言日月薄蝕星辰躔

度推測毫髮無遺在長安與監中西洋專家反覆辨論羣皆歎服

胡著有中星譜周天
現界圖步天歌行世

龍舒方直之工射覆客匿黃錢一命筮之方曰金體
四文旣圓且方流布天下錢文爲光竟中錢坐客莫
不歡悅

方名其義江南桐城人天才橫溢不讓其兄力矯
健能騰身屋上樓如平地時推爲兼才兄弟密之優
于天官易數亦精射覆人以公明曼倩不能遠絕

吳志伊亦精樂律會于市上見編鐘一枚叩之曰此

大呂鐘也後滌視欵識云古大呂之鐘

陸麗京孫宇台並精京氏學于甲申除夕各占元旦
明晦麗京決晴宇台斷雨次早暉曠日出晚卽滂沱
雨來人咸異之

孫宇台旣精易課兼善潛虛嘗與陸麗京同在臨平
沈去矜座陸舉之字問孫云今日當得幾客孫應聲
云之文十一也已而果驗

海昌范文園工相術邑中有隙地或塑太歲范以爲
威儀具足應享巍峩未幾遂成巨刹又指禾中千佛

閭肖型慘戚當厄於火已而果災

范名駿文自弟也浙江海寧人事親孝與兄弟友恭子朋友信而又好推分施與拯濟人之艱危嘗夢神人付以右髻自稱右髻道人遂精相術語多奇中入京師一日驟名動公卿

巧藝

毛大可善歌沈康臣吹洞簫和之能曲折倚其聲

沈工書法王柳顏歐鈞畫摹脫盡變極
神旁通篆籀偶刻石爲印記士林寶之

萬年少自詩文畫之外琴棋劍器百工技藝細而女紅刺繡猶而革工縫紉無不通曉唐叔升歎謂我輩十指雖具乃如懸槌若是何種慧性一能至此

萬名壽祺江南淮安人己卯孝廉
唐名堂江西金谿人

顧樵水詩篇秀絕畫亦屬能品嘗作秋林圖贈吳梅
村吳歎曰對此尺幅使人幽思頓生

顧名樵江人

吳名偉業字駿公江南太倉人
舉辛未會試第一歷官司成

洞庭葉林屋少嘗學翁家鎗每投石超距以驗其法
會有賊艦泊太湖欲上山肆掠葉倡率鄉勇却之一
時稱其絕伎

王筠侶工繪事不屑屑師古所畫山水樓觀人物草

木蟲魚蕭遠閒曠間出古人之上人爭貴之性任誕
不羈非其所悅雖權貴人迫之不輕作

王名崇節直隸宛平人大宗伯敬哉母弟生五歲
而孤多病習懶慢不喜爲章句學學擊劍走馬舉
武科爲興州衛千總久之不樂棄去放浪家居益
肆力爲畫宗伯素友愛筠侶未嘗倚門地請謁足
不至公卿門或乏食不肯向其兄及從子輩索一
錢甘心貧約以繪事自食其力士大夫雅慕其人
求畫者滿戶外必先償直後欣然命筆梁大司農
見之稱爲絕藝厚酬以繒帛辭不受曰崇節貧安
用帛爲更易金如其常直強之乃受其廉子取又
如此朝廷聞其名召見中和殿筠侶偉丰儀鬚
長數尺上命起立視良久令供奉畫苑時年六十
餘以足疾引退從子司空爲築室娛老遂不出
未幾病卒畫益貴生平不飲酒喜婦人得金卽持
往狹邪立盡初私一婦其夫覺撻之創甚婦自經

一夕坐室中見婦忽至似有所語筠侶大驚憤家
人于簾間見婦裙影隨之入遂不見亦異事也

蔡紫佩具絕人之姿不恃攻苦輒能爲文章詞賦歌
詠論議卽下及書數繪畫博塞游娛之細無不意志
所至手目畢達

蔡名琳浙
江蕭山人

毛稚黃小姬療勢漸欲肉骨沈去矜以一刀圭愈之
毛大驚歎曰曾聞敵二豎過于五丁東陽顧影腰帶
幾何竟具神力乃爾

沈文人工繪事兼善音律間爲小詞直窺稼軒之奧

其穠情逸韻周勒山謂蕙草雪消不足方也

沈名永令江南吳江人官龍門令

胡循輩下第南還至汝陽之西遙望黃埃起處一矢
驟至少頃賊披介胄奔躍日中同行者盡蒲伏胡躍
怒馬從衆中出拓弓大呼連擊數賊賊披靡走胡徐
過市下馬解衣踞胡牀乘風綠槐樹下久之同行者
始至驚曰神人也

錢唐藍田叔工寫生陳章侯請藍法傳染已而輕藍
藍亦自以不逮陳終其身不寫生曰此天授也

陳名洪綬好畫蓮自稱老蓮浙江會稽人數歲見
李公麟畫孔門弟子勒本能指其誤處十四歲懸
其畫市中立致金錢後游于酒人所致金錢隨手
盡尤喜爲賓儒畫賓儒藉陳畫給空豪家索之千
緡勿得也嘗爲諸生學使索之亦勿得顧生平好
婦人非婦人在坐不飲夕寢非婦人不得寐有攜
婦人乞畫輒應去崇禎末命供奉不拜尋以兵罷
所寫博古牌爲新安黃子立摩刻陳死後子立
見陳至因命妻子辦衣斂曰陳公
畫地獄變相成呼我摩刻遂死

張開鶴性簡曠嗜飲多少進輒醉醉輒喜畫蘭勃勃
有生氣陸子黃嘗得所畫懸之素壁忽發香滿室中
陸異之因額其處曰蘭堂

張名道岸字懸渡浙江湖州人茗南四隱張其一也

祝培之年已七十能于徑寸牙牌上書桃源記細髮爲行微塵遮字更畱其下爲作圖周櫟園見之歎曰使劉子驥遇此定應畏其局促攢眉而去豈復生問津想

周又嘗稱濟南胡春以鶯管作簫笛有穿雲裂石聲

寵禮

世祖御極之初命公卿大臣子弟入衛時商邱宋文康公長子牧仲年甫十四儀觀俊偉冠侍從冠蟒衣袴褶帶刀侍 上左右 上愛重之每賜食中和殿

一日牧仲對食遜避私出帶間斜幅裹餅餌棗栗將懷之 上怪問牧仲前跪謝曰臣有祖母老甚愛臣臣懷以獻榮 上之賜也 上喜自是每賜食必盡敕以歸

琉球中山王請封 上慎于擇使下部議須通經術善詔命者廷臣會推翰林汪楫以充正使汪才質端偉專對具宜入見 上大悅賜一品服璽書金冊臨軒遣之汪自國門駕八騶天仗前導龍旆飛揚郁亭張設不絕于路朝士賦詩送者數百人

康熙二十年琉球國世子尚貞遣陪臣來請襲封
上嘉其恭謹守禮許之故有是命

金沙史遠公精畫事鎮國公延之閣中屬以練素時
方初暑史濡毫脫冠于案公來縱觀戒令勿起史遂
忘冠坐爲應對蔣馭鹿從旁笑曰山野之士疎放自
然若史某者真所謂脫帽露頂王公前矣公笑應曰
君不見揮毫落紙如雲烟耶

公精白純謹樂善小心願以漢東平自期閒居雅
好詩文兼事翰墨禮賢下士氣度淵宏無涯際
史名鑑宗江南金壇人頗而長美鬚髯高顴濃眉
晴光射人心靈敏多藝能能詩善奕工字學兼精
丹碧凡智巧事人不能解者一見輒悟悉無疑辛
卯舉孝廉慷慨有大志浮沉學舍爲生徒師尊鬱

不得志

而死

蔣名鑑一字玉淵江南武進人鎮國公開府奉天

禮聘天下名士馭鹿首應其選毛稚黃云馭鹿無
千而好游忘

名而喜友

任誕

金穀似詩歌頗有唐調汪鈍翁北游時金來話別值
賓客盈坐金都不敘語竟出其所作送別長歌朗吟
一徧捧腹謂汪曰此詩何如高達夫舉坐默然汪領
之而已

金名式祖江
南吳縣人

劉公載性曠達嘗置酒慈仁寺松下遇游人至不論識與不識必牽挽使飲有不能勝者必強灌之至醉嘔乃已

劉名體仁江南潁川衛
人乙未進士官吏部

姜學在嘗襍被挾一童子附佑人舟往登洞庭東山山中多富人絕不與通刺相羊僧寺中見一丐者題壁絕句異而物色得之延置上座與之共飲食丐者不知何許人顧握手曰若真知我者姜遂大喜

姜名實節山東萊陽人爲黃門貞毅先生仲子少不事舉子業獨習爲五七言詩善鑒別書畫及周

秦以來器物遇其所欲得雖卬價以售不吝也
寓吳門所居位置潔清日邀致諸名士賦詩飲酒
盡出其所蓄書畫器物摩挲賞翫移日抵掌不倦
絕無貴公子驕倨態雖吳中好事者亦相顧以爲
不如也
丐者與姜論詩稍久輒亂以他語僧或
侮易之丐者起批僧頰竟去不顧他日姜又訪求
丐者于途人或訖姜交非其類姜益大喜錄其數
詩歸摘以詫汪戶部鈍翁汪讀其詩多恍惚物外
語固謂微濁丐者異人卽公子亦異人也

梁公狄初與豫章王于一交兩人相論詩每篇成不
卽示草率相攜至荒臺古寺車馬不經處始出詩共
讀狂呼驚拜或至慟哭而後返

梁名以樟一稱鷲林直隸宛平人庚戌進士官太
康令每在酒坐主客獻酬獨據席出袖中白板扇

字高聲三讀不
覺四坐有人

陸麗京與徐孝先分雖甥舅契若金蘭嘗劇醉共被
臥徐咍臺中大吐早起不覺但見牀下地污乃曰舅
昨茗芋耶陸亦不能辨

徐名介浙
江仁和人

陸麗京云苟奉倩取婦遺才存色此是至言非關興
到假令左思張載可與同筆研寧可共枕席耶

栢斯民性僻山水嘗寓西湖一日冒雨執繖獨上北
高峰頂引領四望衫履淋漓見者咸笑爲癡栢意愈

自得

相名古一字雪耘江南華亭人蓬蒿滿徑筆瓢屢空工古文詩詞書法曠然有千古之志

沈漢儀家貧好客每遇良友輒慷慨沉飲或勸以稍事生業對曰良朋樽酒吾故藉以生者

丁野鶴在椒邱每晏起不冠擣管倚樹高歌得佳句呼酒禿髮酣叫傍若無人間以示椒邱諸生多不解因抵地直上牀蒙被而睡

王丹麓不好棋每見客手談輒亂其局或竟擣子納廬中曰日朗天清奈何爲此鬼陣

王介人善故金吾張道濬一日張會貴客並邀王酒行舉樂客皆正襟坐王直入解髮跣兩足踞上席客大驚目眎王王言笑自若

諸虎男常云酒可千日不飲不可一日不醉

沈子均從朱近修游妙峰菴遙望棲鳳災棲鳳故沈所居人爲沈弔沈曰可賀也詰其故曰家所有惟身耳我已攜家妙峰來矣庸何弔竟不歸

沈浙江奉化人少時饒生產任俠贈人遂中落又喜飲酒醉或眠井中不肯起善詆諧娓娓竟日不倦亦工唱曲偶從尊湖歸唱于途有人蹣跚至其家怪問曰客何來應曰欲走奉化聽公曲迷失路

今世說卷七

耳沈以爲知音止宿
設醴成賓主禮而去

今世說卷七 終

今世說卷八

仁和王晫丹麓撰

簡傲

汪鈍翁性狷急不能容物意所不可雖百責育不能掩其口其所稱述于當世人物之衆不能數人

汪鈍翁頗自患嬾放兼以此規王西樵王莞爾曰長安車馬喧鬨若無吾黨一二孤寂者點綴其間便成缺陷

周櫟園好客然不耐俗士有過從者周便率意與談

談盡輒望其去坐少久輒露不快色去又輒忘其姓字

謝石臞判常州日持一卷書坐廳事有吏抱牘至輒揮之鄉先達請燕見者亦往往謝去顧喜與諸生論古今以文章爭勝負人目之爲傲吏輒欣然有喜色

謝名良琦字仲韓一稱獻
菴廣西全州人壬午孝廉

陳散木性狷介不爲苟容素健辨論遇客或不合抗首立挂之不少遷隨或憾焉散木聞而曰我之所嫉怒我固然卽爾見喜正復何益

陳名世祥字善百直隸通州人才勇氣銳落客寡
合與同好堅則金石意所不屬望望然去之性嗜
飲善治鴻政生平博覽強記每與座客會隸事肆
應不竭弱冠舉于鄉久乃得官新安令終以不育
折腰解組歸益獨行其意托興于詩詞雅好游名
山水之所在淹留至忘歲月家人生產不問也

王山長嘗讓杜于皇傲慢不求友杜云某豈敢如此
只是一味好閒無用但得一覺好睡總有司馬遷韓
昌黎在隔舍亦不及相訪也

王名岱湖廣湘潭人能詩文兼工書畫嶽崎磊落
以氣節自命髮甫燥名滿海內己卯孝廉官學博

燕人梁公狄瘠立嶽崎遠客萬里初至鄞客于梵舍
兀然坐一藜榻有客造戶謁入不延里中薦紳聞梁

至置酒相迎梁彊一過見席中客有非類卽命人取水洗雨目良久立上車去

徐大文將游豫章其友吳慶百林玉達送之時徐年少慷慨涉江遙指笑曰吾過洪都惜子安已沒無可與言詩者客或乞吾書正恐麻姑碑板羞見吾耳

徐名林鴻一字寶名浙江海寧人少時卽名播江左數好游所至公卿大夫及賢豪長者爭願交歡

來成夫授書江園與其徒同邑沈功宗山陰傅宗夜秉燭藉廣氈箕坐縱談古今興喪得失及漢魏以來理學藝文人物徹三晝夜及遇軒冕與不當意端視

緘默雖終日不出一語問之間亦不對故相值者多
卜來語默以示臧否至爲語云言勿言視來蕃益重
之焉

來名蕃浙江蕭山人負夙穎十歲出試輒冠軍兼
精六書能作古文魚籧大小篆殳隸八分第不輕
爲人寫好立名節每道東漢人物人有以東漢人
物相擬則喜來本甲族蕃獨居貧空敝衣縷裂所
儲固史外惟餅盞十餘實米鹽紵絮千其中每出
行書衣筆袞手自持抱至有挂兩肘繫繩蔽以博
袖儼五石匏者嘗大雪忽憶毛甡遠遊覆笠登
香爐峯四顧蒼茫吟所製八君咏詩歎哭乃歸

商邱徐恭士榜其門曰問君何所長客至必指此問
之有一藝者卽與盤桓竟日或都無可採輒踞坐揮

手曰客休矣

徐名作肅河
南商邱人

董文友少時氣勇神踔視天下人無可交者每朋聚翕然手揮而已如不相識及合坐捉筆爲文獨寫數千言不休文成坐客不解一語輒瞪目相視人咸目攝之

沈君善性不喜俗嘗持不語戒手懸一牌上鐫不語戒三字有貴人訪之曲致殷勤君善瞪目直視出牌示之不交一語貴人去適周安期顧茂倫及其弟留

侯來相與傾倒雄辯四出或譏其太過君善指其口
曰天生我口不解與儉語見快人不與語又安用我

口耶

沈名自繼江南吳江人副使琬之子與弟自徵自炳自嗣自然自南自東妹宛君俱有才名詩文盛于世

周名永年吳江人少負才名制義詩文倚待立就才器通敏風流宏長禪宮講席西園北里參承錯互詩酒淋漓莫不分身肆應歌

酬曲中海內咸以通人目之

畱侯性簡亢嘗謁大吏雅聞沈名以所作詩文示之沈覽畢盛稱其居官大吏曰以詩文示子子稱某居官何也沈曰知公勤于政事那有閒心檢點及此大吏甚銜之

排調

客問汪鈍翁何意沉酣故籍中汪徐應曰身之好書政如君侯之好博奕

彭羨門在廣陵見沈去矜董文友詞笑謂鄒程邨曰泥犁中皆若人故無俗物

劉公勇棄官入蘇門依孫鍾元嘗築堂孫所居側久之厭其蕭寂棄所攜一琴于堂而去因名畱琴堂王儀曹作畱琴堂詩其起句云身是巢由未得閒聞者便爲絕倒

葉元禮素病羸然頗不耐杜門客有憂之者或笑曰
猿狙之性動而彌壽

有人語杜于皇某一介不與却未一介不取可謂一
邊伊尹杜應之曰某無周公之才使驕且吝豈非半
截周公

宋禹域短而多髯嘗同沈漢儀讌集沈曰吾爲監史
當以兩官畀一人因指宋曰汝以參軍兼主簿衆客
皆笑

宋名嗣京一稱定山浙江仁和人丁未進士官邑令

計甫草故貧士嘗置一妾晨夕設食惟粗糲而已妻張夫人謔曰古聞糟糠之婦不聞糟糠之妾如何舊有相國堂聯放閑肚皮喫飯立定腳跟做人或議首句不佳徐野君曰彼小人常戚戚者震雷常在七箸間那能放開肚皮喫飯

陸麗京飲陳際叔家半坐欲起謂主人曰陳家惟卜晝耳際叔弟魯季對曰君不聞孟公投轄耶陸更入座

毛大可會侯同詣李湘北李笑曰不謂今日初見二

毛

徐世臣與陸麗京同舟下臨平詼笑百端竟日相持時潘新彈及陸弟左城俱從壁上觀但覺入其元中不能定其勝負

潘名沐浙江仁和人
癸丑進士官翰林

王丹麓年踰四十益復困頓婦戲語曰同學少年皆不賤奈何夫子獨長貧王曰吳廬少詹有言貧者上天所設以待學者之清俸金陵吳介茲亦言天以貧德人今處儕類之中天幸德我特頒清俸義難獨享

願以共卿婦哂曰君意良厚但不知何日俸滿耳
婦姓鄒文學公遜女十六歸王布裙操作客至供
饌惟謹一日王欲賂客適無錢大爲踴躇入謀諸
婦婦故難之曰身所有祇此髮耳惟君所裁王曰
卿未嘗倩筆畫眉顧乃假手截髮耶婦笑拔簪付
之

輕詆

周櫟園見士人日事奔競輒曰是以日遊神兼騎望
火馬者

宋嘉祐中未有謁禁士人多馳騁請托有一人號爲望火馬又一人號爲日遊神

蔣絢臣與周櫟園論詩云時遷雖惡然亦有足採者

臭泥中生蓮花但採蓮花勿取臭泥可也周云但恐
盡是臭泥無蓮花在

蔣名玢一字用
農福建閩縣人

王阮亭自淮上還青簾畫舫乘風南下與汪鈍翁相
值秦郵湖遙語曰有事欲附致家博士及遺信至乃
寄舫中所有第二泉四器而已汪以道遠稍難之王
攢眉曰汪大乃成俗吏

程周量嘗撫慈仁寺松歎曰長安諸賢率皆未登庾
嶺故使諸松浪得盛名

程名可則一稱石臞廣東南海人舉壬辰會試第一官桂林守

大覺禪師云吾心眼頗平等然因指見箕尾甚喜觀水中荇藻亦喜縱目空碧亦喜獨對清狂不慧人刀刁魚魯殊不耐

師名通琳字玉林江南江陰人世祖拜爲宏覺國師

陳士業嘗論當世名流卓然足自表見者屈指不過二十輩其餘率多樊英殷浩聞其姓字或亦赫然與之狎處往往使人自咎其傾注之過

陳名宏緒江西新建人清襄公道亨子賦性警敏少而好學集書萬卷日與四方知名士講習其中

家以是落岸然不顧

周雪客嘗品白岳如五都之市雖珍異錯目一覽輒盡

周名在浚
櫟園長子

陸麗京長于引古毛稚黃善于標新毛讀陸文每曰苦成語多

張祖望弟祖靜祖定俱能詩祖靜微遜孫宇台嘗讀其詩賞之曰人言張氏兄弟如腰鼓夫豈其然

祖靜名麒孫
定名振孫

地師沈六如過王丹麓指庭前不宜種樹謂口字著木是困形不佳王曰誠然吾賢亦未宜立此口字著人豈不成囚字乎沈默然

假謫

周金山少以詩名海內後與宋荔裳同爲郎遂相與往來賦詩每一篇出羣遜謝勿及周有子鷹垂方年少間嘗誑客以其詩雜金山集中讀者竟無以辨旣而知之輒驚顧歎服鷹垂由是知名

鷹垂名綸田號淵嘗言金山少工徐庾家言鷹垂又復蜚聲淡藻後先掩映真庾家之有子山徐氏

之有孝
穆也

雲間諸乾一董蒼水于重陽後作神山之會卽彭仙人棲神處也時婁東吳梅村在坐連遺覓女郎倩扶必不得夜分滬上張宏軒刺史來赴投刺後吳命以已車迎入使者傳覆需兩車人頗訝之及至則挾一衣冠少年光豔暗射若薄雲籠月人各却步且不敢詢姓氏及移燭燭之則倩扶也一座譁然

諸名嗣郢一稱勿菴江
南青浦人辛丑進士

侯輔之少遭家難避居嘉興捕者突至逮繫登舟候

默然手執周易熟視之倦則依榜人臥捕者以爲癡
且以紈綺少年易制也將抵會城各簡視行李或登
陸意益懈侯睨視兩岸桑翳然無際突起竄身坐桑
林中捕者盼睭出不意疾追不能得夜燃炬大搜林
中候望見火光所指卽疾避之微行近白門遇詰者
以周易示之曰我卜者也遂脫于難

侯名忼河南商邱人太常卿執蒲季子大司徒恂
大司成恪皆同父兄也兩兄蚤貴兄子方鎮方夏
方岳方巖方域皆以才名交滿天下家門赫奕莫
與比輔之和雅修飭檢身若寒素不爲貴介驕蹇
之態閨戶讀書孝友恭遜兩兄亦愛憐之順治間
貢入京師文日有名人勸之什不應深居簡出擁

書自娛凝然不苟言笑得失哀樂不形于色平生寡嗜好獨好飲酒每飲必醉醉亦不亂性不喜廣交獨于兒子方岳相愛贊同里賈開宗徐作肅徐隣唐宋峯等數人爲文酒之友意泊如也

汰侈

翁逢春游武林輦橐中金二千於寓廡下一日被酒歸蹴金傷其趾遽怒呼曰吾明日用汝不盡不復稱俠遂徧召故人遊士及妖童豔倡之屬期詰旦集湖上是日檮舫西冷橋合數十百人置酒高會所贈遺纏頭無算抵暮問守奴餘金幾何則已告盡矣

翁世居洞庭之東山官舍人

忿狷

劉伯宗下第孫阿滙歎曰九華奇秀不入江上名山
誌巢湖亦江淮巨浸不入禹貢水經山川有知寧不
感憤

孫名沂如江
南六合人

黃九烟落落高踪時人惡其冷鄧孝威曰今已無伯
通之廡下安所得杜陵之草堂耶只須移家渡江向
九龍峰依阿垣最爲長策

黃名周星江南江寧人庚辰進士官戶部以文章
名節自任兼擅篆籀工圖章性骯髒難合雖處困

窮不改其操君子高之
鄧名漢儀江南泰州人

馮幼將與櫟園書云淪落旣久耳目都慣塵沙撲面
只是春風毒霧侵人亦如汎瀝

馮名肇杞浙江會稽人

王仲昭性簡脫與俗忤年過壯盛鬱抑不得行其志
日偕友人散髮袒裸浮拍糟邱意極興酣嘻笑怒罵
不復知人間事

夏樂只慷慨任俠好與貧士遊客至輒命酒不給則
解敝衣貰之有障扇過門者便欲塞戶偶有所感乃

首戴瓦蓋哭于西陵橋上曰新乎新乎

夏名基江南徽州人僑寓湖濱能詩工書畫曠然有高世之志

尤悔

王西樵里居時屢空見廸卒歲渺歡嘗雪後出爲人家送葬從驢子背上作西樵山人傳一篇稱心而言自謂實錄一出心跡乖反遂使此文不復可傳每爲歎絕

袁重其將出遊母爲脫輕容衣浣滌更紝以衣子袁衷之褐以褒衣久之脆時就客飲有鑄工爲之按摩

悞爲所裂初不覺歸寢解外服露母前所改衣襪
不可鉛大驚捧衣長號悔痛終身不能釋

惑溺

張幼量行長白山中見有巨黃石甚佳以牛三百頭
拽至園亭每語人曰此石絕似大癡畫中物又嘗愛
一竹根石大不盈寸根節宛然撫翫不去手

張名萬解山
東鄒平人

新城二王好爲香奩體或以綺語爲言西樵云不過
使我于宣尼廡下俎豆無分耳

陳其年嘗作詞懷二王有云名士終朝能妾語院亭讀至此笑曰家兄與下官不敢多讓

朱錫鬯詩才雋逸文尤跌蕩可觀然性好飲酒嘗與高念祖入都每日暮泊舟輒失朱所在及高往求之朱已闌入酒肆中醉臥廬下矣

朱名彝尊浙江秀水人薦舉博學宏儒考授翰林高名佑鉅浙江秀水人

周櫟園官閩每求江瑤柱輒令蠶人取諸梅花石
問其甲上紋如瓦楞映日視之與綠玉相類彩色爍
熣晃人眸子周語人曰卽此膚理便足鞭撻海族惜
其生育遐陬不登玉食耳

楊香山客揚州有鬻鶴者傾橐爲易二雙載歸嘲笑
並至楊子門可羅雀對之如得良友老乏丁男撫
之如倚玉樹寂處無絲竹之娛屢空有交謫之感戛
然一鳴悅心盈耳憂鬱可捐因賦詩十章爲友誦之

楊名體元直隸大
興人官郡司馬

邵僧彌性舒緩有潔癖整拂巾履經營几硯皆人世
所不急乃爲之煩數纖悉僅僕患苦妻子竊罵終其
身不爲改

邵名彌江南長洲人清羸頤秀好學多才藝於詩
宗陶韋于畫彷元宋於草書出入大小米楷法逼

虞褚稱絕工平生揮灑小幘尺幅人皆藏弃以爲重或購之累數十金乃用以搜金石訪蟲彝及圖章玩好諸物此外蕭然無辨題所居曰頤堂置一榻其中以藥爐茗具自娛賓客到門聲教雅步移時始出與人飲不半升頽然就睡雖坐有重客弗顧中年得小消疾覽方書多禁忌和採燥溼飲啖多寡不能適其中以此益困殆其迂僻如此

王于一晚歲客湖上狎一妓頗麤陋或嘲之王笑曰近代美人尚肥

徐野君性洒落不與人事獨好觀俳優戲以爲騷人逸士興會所至非此類不足稱知已

吳介茲食文官菓每一含咀不忍直下嘗語王隆吉

曰香甘雪嫩令人輒有奴視楊梅雞豆之想

王名廷棟江南儀真人王子孝廉

李啟美嗜古學抱疴十月猶聚書牀頭讀之將革歟
曰吾死矣獨念茫茫泉路能讀書否悠悠來生解讀
書否不勝於邑

李名潛一名洵士美江南興化人

辛先民客居吟歎聞有人招飲直欲捐性命徇之或
諫其不節辛笑曰奈五臟神願馳驅何

辛名民一名霜翊字嚴公直隸宛平人壬午孝廉官司理

徐伯調好鍊冲舉餐氣啜液嘗自厭毛髮不潔作游仙詩以自喻

洪潤孫以博雅擅名乃有潔癖每齧面輒自旦達午不休陸麗京儇胡共往看之洪爾時神氣傲邁旁若無人

洪名景融浙江錢塘人

查醉白繼婦陸陸故名家子性敏又善詩嫵婉酬唱相得益歡陸亡查哀痛咯血升許已復爲悼亡詩百首多酬陸韻悵悵若有失踰年竟死

查名繼昌浙江海寧人七歲善吟詩十三游庠序美風儀郡邑試士或里社高會諸少年咸集查至詞說慷慨顧盼輝如一坐驚歎無不願交查者工臨池能辨古彝器及唐宋諸家翰墨圖繪又學射學奕雖不工亦自負

王丹麓喜方術一日檢書得同夢方時念張廣平處京師特千里致書相期試夢聞者笑之

張名元時浙江杭州人少時與弟辭奇同執經應嗣寅之門應便深賞嘗作詩與廣平云子旣張目無不識弟亦下筆如有神兒如亞子真可畏元方季方安擬倫後果以詩文聲冠一時

王丹麓家旣落顧時喜刻書客至質衣命酒其詩曰平生好賓客資用苦不周有懷莫可告室人且見尤

施愚山誦之輒失笑曰蓋有類予者

全詩具載
松溪漫興

今世說卷八 終